

四庫全書

集部

欽定四庫全書

集部

劔南詩稿卷五十四

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劍南詩藁卷五十四

宋 陸游 撰

湖上急雨

谿煙一縷起前灘
急雨俄吞四面山
造化等閑成壯觀
月明却送釣船還

夏日獨居

平生本清淨
垂老更蕭然
已罷客載酒
亦無僧說禪
空

庭朝下鵲密樹晚鳴蟬長日君無厭新秋近眼邊

溪上夜釣

少時妄意學金丹八十谿頭把釣竿露濕菱葢姑惡哭
煙深沙渚鷺鷥寒登臨每歎乾坤大強健猶應歲月寬
作意清吟未須厭如山殘豪後人看

幽事

曳杖驚林鵲投竿胃澗花若非詩滿卷只道夢還家開
士分朝飯隣翁喚午茶悠然吾事足歸路竝山斜

夙興

幽夢回千里高城轉五更窗虛送月落竹動喜風生自
笑行安往猶思坐待明郊居少僮僕手自闢柴荆

文章

文章在眼每森然力弱才疎挽不前前輩不生吾輩老
恐留遺恨又千年

閑遊

觸熱辭行在扶衰返故丘亂蟬催落日病葉報新秋秣

蹇投山驛尋詩倚寺樓不因行萬里那信此生浮

又

剡縣有佳處吾行無定期橫塘供晚釣孤店具晨炊約
客同看竹留僧與對碁人生得自在更老未為遲

又

我出亦何急輟行還悵然輕裝幸已具老健更誰先野
飯聊支日山蔬不直錢此生終樂死何以報皇天

又

已破京塵夢還尋剡曲遊戴星離古戍衝雨憩山郵壁
認曾題字門橫昔渡舟經行固多感隨處寄悠悠

夏日

赫赫炎威日正中冰紈笛簟欲無功一心願伴沙頭鷺
百計難呼木杪風纖手削瓜刀似水小嬰分酒盞如空
洗心幸有高樓月少待寒光出海東

蜻蜓浦夜泊

風雨忽如秋已深短篷今夜繫楓林溪翁那問市朝事

蔬食不生盂炙心橫截煙波飛健鶻遠投沙渚落羈禽
斯遊誰道傷幽獨猶有殘鐘伴苦吟

幽興

微官那得繫疎慵幽興渾如社酒濃埽盡塵埃無一點
洗空幻翳有千重百年到處俱羈客萬里從來付短筇
身在有餘真妙語盂羹何地欠秋菴

避暑近村偶題

乞得身歸荷聖時登臨筋力未全衰楚祠草合三叉路

項羽廟
在項里

隋寺苔侵半折碑

安隱院也

孤店不妨棄月宿扁舟

頻為看山移紅塵冠蓋真堪怕還我平生白接羅

南堂夜坐

老來日月駛秋令
俄更端蟬號晚愈壯
螢火流空園西
風吹衣裳蕭然謝
炎官飽食一事無
散髮坐前軒
河漢西南流
北斗何闌干
坐久光彩變
缺月涌金盆
欲睡復躊躇
草棘露已漙
徂歲何足道
死生付乾坤

立秋前一夕作

螢度梧楸徑鳥鳴蒲葦洲寧知八十老又見一年秋賀
監稱狂客劉伶贈醉侯吾身會兼此已矣尚何求

憶昔

憶昔西遊兩鬢青即今鏡裏雪千莖蛾眉風月猶關念
濯錦鶯花已隔生避暑有時移枕簟畏人終日閉柴荆
此懷恨欠詩千首且寄秋泉一再行

自嘲

外澤裏常粗元知似瓠壺仕因無援困學為背時孤軒

蓋愁城市風煙落道途
它年遊萬里不必念歸吳

夜坐亭中

大澤秋初到荒庭夜自明
風雲生有候河漢落無聲
病得新涼減詩因少睡成
高枝有烏鵲栖穩若為驚

養生

稟賦本不强四十已遽衰
藥裹不離手對酒盤無梨
豈料今八十白間猶黑絲
咀嚼雖小難幸未如牛
伺昔雖學養生所遇少碩師
金丹既茫昧鸞鶴安可期
惟有庖

丁篇可信端不疑愛身過拱壁奉以無缺虧孽不患天
作戚惟憂自詒孽壁豈不苦害猶在四支二豎伏膏肓
良醫所不治衣巾視寒燠飲食節飽飢虎兕雖在傍牙
爪何由施老人不妄語聊賦養生詩

飲酒近村

放翁睡多少行立人扶往赴鄰里集痛飲山花插鬢紅
醉歸棘露霑衣濕紗巾一幅何翩翩庭中弄影不肯眠
莫欺此老今衰甚曾見高皇狩越年

遊山

蕭散湖山路天教脫馬羈蟬聲入古寺馬影度荒陂樵

唱時傾耳僧談亦解頤偏門燈火鬧不敢恨歸遲

偏門會稽

城西南門名

又

久客喜歸舍況逢秋氣新聊棄行藤子閒覓佳菴人道
士青芒屨高僧白氎巾更須苔井水一為濯京塵

又

病退猶行倦山坡每少休高枝聞鵲語淺瀨見魚遊偶
有堪棄興元無可遣愁悠然又終日爭路有歸牛

又

古寺不來久入門空歎嗟僧亡猶見塔樹老已無花世
事雖難料吾生固有涯慙慙一梳月十里伴還家

聞蛩

蟬聲未斷已蛩鳴徂歲崢嶸得我驚八十光陰猶幾許
勉思忠敬盡餘生

又

稽首周公萬世師小儒命薄不同時秋蟲却是生無憾
名在幽人七月詩

入秋遊山賦詩略無間日戲作五字七首識之以
野店山橋送馬蹄為韻

束髮初學詩妄意薄風雅中年因憂患聊欲希屈賈寧
知竟鹵莽所得纔土苴入海殊未深珠璣不盈把老來
似少進遇興頗傾瀉猶能起後生黃河吞鉅野

又

我昔西遊邊萬里持一劍風殮不自恤露宿未嘗厭棧
危餘漢燒山斷有秦塹敢誇胡羊美但懷巴酒釀回首
四十年遠遊每闕念秋風跨蹇驢尚喜道傍店

又

周南太史公道家蓬萊山塵凡不可料亦復居其間屢
奏乞骸骨寬恩許投閒羽衣碧玉簡尚綴僊官班黃精
埽白髮面有孺子顏簡寂吾家舊飄然時往還

又

我行剡中路茆店連谿橋驢弱我亦飢解鞍雨蕭蕭投
床得小憩炊黍烹藥苗舉手謝主人去路盤山腰沃洲
在何許秋葉紅未凋遊僧不可逢聊須問歸樵

又

怕事真驚病老作入都夢頭顱今何似尚復堪自送聯
裾預登瀛策馬從上雍年衰當亟去恩大容力控雖言
解朝藉尚予侍祠俸明年即八十日月難把弄著書則

已矣努力謀社氣

又

吾才如蹇人何許逐奔馬
吾文如醜女惟藉粉黛假
向來已歸休畢志向林下
塊然一愚公初不繫用捨
國恩定難報衰涕時一灑
人本不勝天豈復論衆寡

又

驢病比已損秋風輕四蹄
朝遊支遁寺暮涉千古谿
青嶂環孤村綠波溢橫隄
吾行本無定所至窮攀躋
細推

亦何樂正類好鍛嵇自今當務本春蕪飽鉏犁

村居

白首歸來亦灌畦任教鄰里笑栖栖道心寧感兩雌雉
生計惟存五母雞不恨閒門可羅雀本知窮巷自多泥
暮聞鼓角猶人境更欲移家入剡溪

又

遊子從來念故鄉我歸仍得值豐穰粗繒裁製襜褕暝
肥羜烹調餽飫香對客不妨依几杖呼兒時與話畊桑

却慙未解真齊物猶揀山村靜處藏

又

青藜杖出氛埃外白版扉開水竹邊造物與閒仍與健
鄉人知老不知年坐居每袖持螯手妄想寧流見麴涎
昨夜小庭風露冷菊花消息已先傳

又

石帆山下樂誰如八尺輕舸萬頃湖能釀人家分小榼
愛基道士寄新圖條枚積地樹雞柵溝港接筒澆芋區

父子還家更何事斷編燈下講唐虞

六藝示子聿

六藝江河萬古流吾徒鑽仰死方休沛然要似禹行水
卓爾孰如丁解牛老憊簡編猶自力夜涼膏火漸當謀
大門舊業微如綫賴有吾兒共此憂

七月十七夜五更起坐至旦

秋容淡如水昨暮到江城世事違高枕年華入短檠書
中固多味身外盡浮名倚壁方清嘯蓬窗已送明

書懷

不飢不寒萬事足有山有水一生閒朱門莫管渠癡絕
自愛茅茨三兩間

又

老人舉動須扶掖跣婢椎奴少得閒從此漸須都畫斷
正如避難在空山

又

蝸廬自稱野人居三尺明窗已有餘從此要當常省事

時時小葺欲何須

又

苜蓿堆盤莫笑貧
家園瓜瓠漸輪囷
但令爛熟如蒸鴨
不著鹽醯也自珍

湖上秋夜

湖上山銜落月明
釣筒收罷葉舟橫
不知身世在何許
一夜蕭蕭蘆荻聲

書感

俗學方譁世遺經寔已微斯文未云喪吾道豈其非拔
本寧餘力迷途幸識歸新涼起衰疾燈火耿郊扉

示兒

得道如良賈深藏要若無冶金寧輒躍韞玉忌輕沽儒
術今方裂吾家學本孤汝曹能念此努力莫枝梧

書適

北崦千梢竹東軒八尺床徧行欣老健熟睡領新涼海
石陳書几陶詩貯藥囊時時一到眼亦足傲羲皇

海石
英石

也東坡詩云
海石來珠浦

又

心清絕慾早才薄去官多月下時閒釣雲邊每浩歌野
堂生草覆山市白驢過也有成功處新降百萬魔

放慵

往者畊仍養中間仕易農屢辭身老病每荷上矜從
進魏門三戟歸無畝一鍾扶持得良藥更放幾年
慵

登臨

儘道羈懷惡登臨亦解顏
健嫌山路淺狂恨酒尊慳
親友多疎索漁樵自往還
有詩仍嬾記零落水雲間

寓歎

有位方憂失無家豈念歸
賢愚竟誰得今昨兩皆非
世事無長算人情忽駭機
細思如意處惟有釣魚磯

居家

為吏心雖嬾居家力尚餘刈茅支屋漏栽棘補籬疎就
井磨樵斧持錢鍛藥鉏毋勞歎徒步野鶴豈堪車

舟中作

野老元無事藥閒偶一來微風市樓笛落日寺街槐梨
大圍三寸鱸肥疊四腮鄰船不識面呼與共銜盃

築舍

築舍水雲鄉蕭然似淨坊粥餛菰米滑羹金藥苗香素

壁圖嵩華明窗讀老莊與人元淡淡不是故相忘

雜感

孔欲居九夷老亦適流沙忠信之所覃豈間夷與華況
我州閭間相視等一家老稚各自力勉蹈思無邪

又

十月可釀酒六月可作醬兒曹念乃翁左右日供養比
鄰有老疾亦復致一餉老老以及人此義古所尚

又

肉食養老人古雖有是說修身以待終何至陷饕餮晨烹山蔬美午漱石泉潔豈役七尺軀事此膚寸舌

又

一氣不遽變雨霽皆有符死非一旦至小疾為前驅人能謹察之豈有倉卒虞哀哉不知此雖悔良難圖

又

養生孰為本元氣不可虧秋毫失固守金丹亦奚為所以古達人一意堅自持魔鬼雖百萬敢犯堂堂師

送陳懷叔赴上臯酒官却還都下

奇才初試發硎刀
足馬秋風到上臯
地近雖同三輔重
時平無復五陵豪
極知穩步煙霄路
却要微知郡縣勞
歸去平津開首燕
吐茵應復忤西曹

歸三山入秋益涼欣然有賦

藥物扶持美食眠
鏡湖仍遇素秋天
一年強起歸猶健
百口相看喜欲顛
碧瓦朱甍無傑屋
烏篷畫楫有新船
道山頂上雖清絕
萬頃烟波始是仙

子聿至湖上待其歸

舍北犬吠迎歸航老翁待兒據胡床
碧雲忽起欲吞日黃葉自凋非實霜
十風五雨歲則熟左殮右粥身其康
豈無深谷結茅屋父子讀易消年光

晚行舍後

略約東邊一徑深杖藜行飯當登臨
稷山竝海出遙碧禹穴生雲成暮陰
殘歲自興遊子感少年誰解老人心
歸來燈火參差夜倦倚胡床續短吟

秋夜讀書有感

妄意斯文力弗勝苦心猶欲付雲仍
數編魯壁家傳學一盞吳僧夜講燈
南犬固應多吠雪夏蟲那得解知冰
但令吾道常無墜飲水何妨枕曲肱

又

齒髮凋殘志有餘一編聊復遂吾初
老來每恨無同學夢裏猶曾得異書
家世偏曾慕青紫兒童切莫話龍豬
正令世世皆農圃庶讓何妨化里閭

治圃

小圃漫經營栽培抵力畊
土鬆宜雨點根稚怯鉏聲紅
果方當熟清陰亦漸成
每來常竟日聊得暢幽情

村醉

髮已凋零齒已疎
飽諳成敗更誰如
貴人豈得常金屋
丞相那知起草廬
久泛江湖知釣術
晚歸隴畝授農書
一尊徑就村翁醉
未肯英雄許本初

病卧

蕭條風雨又經旬
病卧真成不覿隣
跨馬難酬四方志
耽書空盡百年身
碧花引蔓緣疎竹
黃雀呼羣啄破囷
君見此時風味否
肯辭人笑橐裝貧

書悔

衣食須畊稼
無端浪出遊
客途南北鴈
世事雨晴鳩
蓬轉何時已
灰寒善自謀
江湖千萬里
何處欠漁舟

航海

我老卧丘園
百事習慵惰
惟有汗漫遊
未語意先可
或

挂風半帆或貯雲一舸起潮亂鳴艣過磧細扶柁近輒
凌烟海自笑一何果邂逅得奇觀造物豈付我古湫石

蜿蜒孤島松磊砢

雁蕩大龍湫石如騰龍東海縣境有巨松傳為堯舜時物湘竹閼

娥祠淮怪深禹鑠鬼神駭犀炬天地赫龍火瑰奇窮萬
變鯤鵬尚么麼紛紜旋或忘追記今亦頗作詩配齊諧
發子笑齒瑳

黃犢

賣刀買黃犢用以事畊稼淒風山北秋缺月溪西夜小

童搢竹枝相呼聊一跨秋來作欄成參差出林罅青煙
起草積微火近茅舍未言東作功此景已可畫

秋夜

老覺人間歲月適惛惛窗戶一燈幽讀書已廢虛長夜
護塞無期負盛秋病齒何堪食梁肉殘軀惟念製衣裘
重陽卧看登高侶滿把茱萸只自愁

目昏頗廢觀書以詩記其始時年七十九矣

少時業詩書慕古不自量晨暮間絃誦左右分朱黃積

書山崇崇探義海茫茫同志三四人辯論略相當落筆
輒千言氣欲吞名場忽焉六十年綠鬢久已霜食必觀
本草不療病在床今秋又病目始覺閒味長車馬既不
至亦無書在傍一坐漏十刻甚倦則倚牆蝴蝶吾前身
華胥吾故鄉童子亦聽睡不復呼燒香

假山擬宛陵先生體

壘石作小山埋瓮成小潭旁為負薪徑中開釣魚菴谷
聲應鐘鼓波影倒松楠借問此何許恐是廬山南

秋興

拒霜慘淡數枝紅
石竹凋零不滿叢
小蝶一雙來又去
與人都在寂寥中

又

足力蹢躅少迎客
目視昏短常廢書
賴是門前秋水長
沙鷗未遽與人疎

湖上夜歸

滿鏡新霜奈老何
扁舟日日醉顏酡
樂如逐兔牽黃犬

快似麾兵卷白波
霜近菊花猶未見
雨餘橙子已堪搓
湖桑小市人無數
爭看山翁擊楫歌

晨起

戒婢篝衣徹屐屨
呼兒滌硯作墮麋
須臾開卷東窗下
即是先生無病時

飯飽晝卧戲作短歌

為農得飯常半菽
出仕固應甘脫粟
藜羹自美何待糝
況復畏人嘲首宿
今年還東已八十
視聽雖存鬢先禿

安能賣藥謀助道

道流賣藥自給名曰助道

但有知分堪養福水車

輓輓鄰餽魚社鼓鼗鼗衆分肉可憐老子暫瞋睨午睡

窗邊自捫腹

里中車蕩取魚舊例以所得分遺

孤學

孤學雖違俗猶為一腐儒家貧占力量夜夢驗工夫正

復安三徑寧忘奏六符殘年知有幾自怪尚區區

自嘲

儒生窮事業老去轉荒唐長日中分睡殘年有底忙書

常嬾終卷詩亦少成章忽棄蓬窗去花前又一觴

試筆

清談數語猶疑過平步徐行亦慮危酌酒淺深須在我
更衣單複要隨時

秋思

烏柏微丹菊漸開天高風送鴈聲哀詩情也似并刀快
翦得秋光入卷來

又

水際柴門一扇開
白頭羸病亦堪哀
阿誰得似桄榔杖
肯為閒人萬里來

又

蒼顏莫怪少曾開
觸目人情大可哀
死去肯為浮世戀
此身元自不應來

晨起偶得五字戲題橐後

推枕悠然起
吾詩忽欲成
雖云無義語
猶異不平鳴
有得忌輕出
微瑕須細評
平生五字句
垂老媿長城

野步

場圃農功畢，村鄰醉叟多。
野風吹慘澹，海氣起嵯峨。
婦女窺籬看兒童，拾穗歌身閒。
不自樂如此，暮年何

喜晴

一夜霜風掃積陰，檐間喚起有鳴禽。
滿窗零亂梧桐影，隣巷蕭條雞犬音。
文史漸宜精討閱，湖山仍得飽登臨。
園丁也解娛翁意，執果移花已滿林。

自箴

帶寬非復昔年腰
頰上餘丹日日消
切勿更為兒戲事
解猿放鶴各消搖

自喜

身閒僊不遠
食足富何加
庭卧長生牘
園開手種花
狂歌聲跌宕
醉草筆橫斜
八十明年是
衰殘豈復嗟

自詒

病中看周易
醉後讀離騷
不解書驢券
安能問馬曹
身隨遊宦困
氣為屏居豪
清旦南堂坐
稽山秋更高

又

莊語畏如俳端居要若齋清虛集心腑枯槁見形骸自
計愚無用何傷老不諧人生須廣大勿作井中蛙

對酒示坐中

綠橙丹柿鬪時新一笑聊誇老健身大度乾坤容縱酒
多情風月伴垂綸初生京洛逢時泰幼度江淮避虜塵
八十年間塵不死猶能澗底束荆薪

秋晚衰疾稍平聊識喜懷

世事紛紛博局中，豈知造物貸衰翁。
短筇倚壁知身健，小甌炊粳喜歲豐。
霜近平郊多雁落，雨頻斷港有船通。
更餘一事生詩興，烏柏新添數葉紅。

偶出至近村

神爽無酣寢，身閒有劇棋。
說詩橫柳栗，賒酒挈鴟夷。
寺古殘香冷，溪深獨木危。
往來元信步，不是赴幽期。

書宛陵集後

突過元和作，巍然獨主盟。
諸家義皆墮，此老話方行。
趙

壁連城價隋珠照乘明粗能窺梗槩亦足慰平生

鄉居

客問鄉居事久居君自知度橋徵士悔過社旅人悲社
散家分肉農閒衆築陂牆東新洗竹我亦補藩籬

重九無菊有感

重陽未見一枝菊他日菊開生我愁高興亭中香滿把

令人北望憶梁州

高興亭在南鄭子
城西北正對南山

劔南詩藁卷五十四

欽定四庫全書

劍南詩彙卷五十五

宋 陸游 撰

記東村父老言

原上一縷雲水面數點雨夾衣已覺冷秋令遽如許行
行適東村父老可共語披衣出迎客芋栗旋烹煮自言
家近郊生不識官府甚愛問孝書請學公勿拒我亦為
欣然開卷發端緒講說雖淺近於子或有補耕荒兩黃

犢庇身一茅宇勉讀庶人章淳風可還古

試筆

用筆如用人利鈍烏可常必欲責其全無乃廢所長宣
城與晉陵聲價略相當不知今何年森然集龜堂和墨
若墜黑擣紙如銀光心手適調一運此紫毫鉞前却俱
稱意六驥馳康莊聊復取一快詎必師鍾張

曠懷

曠懷何啻等沙鷗外物相挺劇火牛若信本心無一事

始知平地起閒愁每逢達士惟長歎欲棄浮生尚小留
今旦微霜好風日短筇且領鏡湖秋

夢行小益道中

棧雲零亂馱鈴聲驛樹輪囷樺燭明清夢不知身萬里
只言今夜宿葭萌

又

欒柳林邊候吏迎血塗草棘虎縱橫分明身在朝天驛
惟欠嘉陵江水聲

秋樹

秋風一夜吹橋樹明日來看已非故
吳中九月霜尚薄落葉半隨飛鳥去
老人心事感凋零只欲逢秋醉不醒
范寬用意真難解偏寫丹楓作畫屏

雜感

鶴藥軒車已堪歎狐帶髑髏何可親
勸君一笑埽除盡來作人間百歲人

又

讒口安能作禍基
吾曹興廢豈無時
向來何事令公怒
問着渠儂自不知

又

艱危寧度瘦驢嶺
奔走莫隨肥馬塵
困阨終身元自好

可憐癡子恨無津

瘦驢嶺在施黔間前輩或有作驢瘦嶺蓋誤也

又

一尊易致蒲萄酒
萬里難逢鸛鵲樓
何日羣胡遺種盡
關河形勝得重遊

又

老境睡多行立少浮生會少別離多
安得此身重壯健一盃朋舊共高歌

又

苦熱惟憂不復涼轉頭忽已見秋霜
道人若悟無寒暑墮指流金總道場

柳橋秋夜

帝青萬里月輪孤埽盡浮雲一點無
正是吾廬秋好夜

上橋渾不要人扶

訪隱者不遇

秋高山色青如染寒雨霏微時數點蘭亭在眼久不到
每對湖山輒懷歎雅聞其下有隱士漠漠孤烟起松崦
獨攜拄杖行造之枳籬數曲柴門掩笛聲尚近人已遯
日啜薄糜終不貶何如小住共一尊山藜野芋分猿獠

蒼檜

北風捲野天晝晦雨如弩鏃穿屋背老夫下牀行躡屐

稚子抱書坐持蓋豈無長楸與巨竹幹折枝摧共顛沛
孰能不動安如山屹立庭前獨蒼檜

農家歌

村東買牛犢舍北作牛屋飯牛三更起夜寐不敢熟茫
茫陂水白纖纖稻秧綠二月鳴搏黍三月號布穀為農
但力作瘠鹵變衍沃腰鎌卷黃雲踏碓舂白玉八月租
稅畢社瓮釀如粥老稚相扶攜閭里迭追逐坐令百世
後復覩可封俗君不見朱門玉食烹萬羊不如農家小

甌吳粳香

君子非好異

君子非好異本意亦從衆居然迫所媿難復趨一閔孟
軻遇齊王夫豈不欲用萬鍾養弟子乃似以利動惟其
有辭受百世尊道統豈惟聖賢哉學者固所共

獨登東巖

早慕功名已絕癡晚耽筆墨愈無奇牧羝未乳身先老
化鶴重歸語更悲朋舊在亡成斷夢山河興廢入孤吹

悠然獨倚闌干笑又過簪萸泛菊時

灌園

八十身猶健生涯學灌園溪風吹短褐村雨暗衡門
正魔君怖心安疾豎奔午窓無一事梨棗弄諸孫

晨起

老尚貪書課黎明即下床不驚天乍冷更覺意差強
蟾滴初添水螭爐旋炷香浮生又一日開卷就窓光

龜堂

莫笑龜堂老殘年所得多賦詩傳海估說法度天魔天
矯竹如意鱗皴松養和拈來示諸子無事數相過

蜀漢

蜀漢崎嶇外江湖莽蒼中冷官家世事獨立古人風已
老學猶力久窮詩未工悠悠千載後此意與誰同

客有言太山者因思青城舊遊有作

我登青城山雲雨顧在下月色縞巖谷欲睡不忍捨明
朝下半嶺頗怪哀湍瀉山麓雲未歸平地泥沒踝乃知

宿處高所恨到者寡有客談泰山昔嘗宿石室夜分林
采變暘谷看浴日九州皆片塵盛夏猶慘栗我聞思一
往安得飛仙術但願齊魯平東封扈清蹕

遊近村

度塹穿林脚愈輕憑高遠望眼猶明霜凋老樹寒無色
風掠枯荷颯有聲泥淺不侵雙草屨身閒常對一基枰
茆檐蔬飯歸來晚已發城頭長短更

疎雨

檐間秋雨時一滴絕似漢嘉方響泉不聽此聲三十載
夢回搔首一淒然

秋曉

菅席多年敗見經布衾木枕伴殘更
嗵嗵天際鴈初度
喔喔舍傍鷄亂鳴
貸米未回愁竈冷
讀書有課待窓明
一秋最恨空堦雨
滴破羈懷是此聲

癸亥初冬作

開歲忽八十古來應更稀
我存人盡死今是昨皆非
愛

酒陶元亮還鄉丁令威目前尋故物惟有釣魚磯

兀坐久散步野舍

湏洞風號木蕭條雨滴堦忽思穿兩屐聊用散孤懷赤

脚春畬粟平頭拾澗柴先師有遺訓萬事忌安排

胡翼之先

生教徐節孝
曰莫安排

法雲寺

不到法雲久高秋初一來厨供菰白美池蘸水紅開橋

畔逢遊衲雲邊數過梳同遊恨歸早珍重約尋梅

小徑登東山繚行自西北至溪上

是夕子
半置酒

行穿犖确度谿牙小立風中客袖斜衰草雙雙點飛蝶
長空一一送栖鴟荻洲薄暮收魚網茆舍初寒響緯車
誰道老人多感慨未妨尊酒樂年華

美睡

老來胸次埽崢嶸投枕神安氣亦平漫道布衾如鐵冷
未妨鼻息自雷鳴天高斗柄闌干曉露下鷄埒膈膊聲
俗念絕知無起處夢為孤鶴過青城

逆旅

秋晚南山行小塞就店秣我亦念少休無奈市兒聒嗟
爾亦坐饑銹銖苦爭奪其心計亦厭陷溺無自脫我欲
救其本汝勿謂迂濶要傾江海大一洗錐刀末人生顧
須幾卒歲無一褐有地即可耕何山不堪活

東園

今日天寶霜又見一日晴晴寒病良已扶杖東園行瓦
鼓息我倦靜聽幽鳥鳴花菓四十株手自培養成疎密

無行列東園蓋強名人看不滿笑聊用適我情

雜感

買薪貸粟不曾知一事無營盡日嬉
耄老却如童稚日
早眠晏起食無時

又

古言忍字似而非獨有癡頑二字奇
此是龜堂安樂法
大書銘座更何疑

又

平生所聞宋華子病忘乃與知道隣老夫歷盡世間事
始覺此公真可人

又

羲皇一畫開百聖學者即今誰造微文詞害道第一事
子能去之其庶幾

渡頭

蒼檜丹楓古渡頭小橋橫處繫孤舟
范寬只恐今猶在
寫出山陰一片秋

小飲賞菊

菊得霜乃榮性與凡草殊我病得霜健每却稚子扶豈
與菊同性故能老不枯今朝喚老父采菊陳酒壺舉裊
舞翩僊擊缶歌烏烏秋晚遇佳日一醉詎可無

與兒輩小集

老子秋來樂事稠吳杭新擣酒新篳矮黃不待園官送
小白每煩溪女留頗飽可憐頻夢與半酣自喜有兒酬
不如意事何窮已且放團藥一笑休

舍北晚眺

平野沉寒日遠村生暮煙離離立紅樹點點散烏犍暫
出不逾歲告歸乃一廛江湖初見鴈着眼送雲邊

書室獨處欣然有詠

鑿空學道本無師歇盡狂心頗自奇閒坐始知冬日永
高談未覺老年衰治棺準備膏肓日釀酒枝梧雨雪時
常笑祖龍癡到底一生辛苦覓安期

冬初至法雲

曉日曛曛露未乾
東中十月始微寒
牛閒處處農功畢
米賤家家酒盞寬
烟浦白鷗迎鼓柁
漁村紅樹入憑欄
歸舟莫恨無人語
手抱陶詩側卧看

感憤

形勝峭潼在英豪
趙魏多精兵連六
郡要地控三河慷
慨鴻門會悲傷易
水歌幾人懷此志
送老一漁叢

記老農語

霜清楓葉照溪赤
風起寒鴉半天黑
魚陂車水人竭作

麥壠翻泥牛盡力碓舂玉粒恰輸租籃挈黃雞還作質
歸來糠粃常不饜終歲辛勤亦何得雖然君恩烏可忘
為農力耕自其職百錢布被可過冬但願時清無盜賊

村舍

剝啄敲村舍丫叉揖主人新牆拆龜兆疎瓦斷魚鱗紅
粒炊畬粟青烟鬱澗薪得床思熟睡寒犬苦狺狺

自述

偶策青驢出還將白鶴隨鍊丹留日觀采藥上天池送

客清秋棹留僧靜夜碁從來閒姓字不遣世人知

泊舟湖橋酒樓下

縹緲雲邊罨畫樓空濛雨外木蘭舟誰知老子清狂甚
獨占城南十里秋

菴中雜書

蒲龕久坐暖如春紙被無聲白似雲除却放生并施藥
更無一事累天君

又

謀生安用苦區區
豆飯藜羹未遽無
若使天年猶合活
不妨自有穀於菟

又

萬物竝作吾觀復
衆人皆醉我獨醒
走徧世間無着處
閉門鋤菜伴園丁

又

茅茨一室有餘樂
輒環四海誰知心
輟耕壠上鴻鵠志
長嘯山中鸞鳳音

連日暴下蕭然不支戲作

老子心如行脚僧
秋風久已辦行藤
紙衾夜夜江湖夢
小復遲留待判懲

大風

風大連三夕
衰翁不出門
兒言卷茅屋
奴報徹蘆藩
狼籍鴉擠壑
縱橫葉滿園
藥除有今日
紅日上東軒

野興

掃盡紅塵閉是非
舍傍好在舊苔磯
壺中春色松肪酒

江上秋風榭葉衣一片共知雲偶出千年誰識鶴重歸
勿言野外無供給雪後連山藥草肥

又

樓蘭勛業竟悠悠聊作人間汗漫遊半谷雲霞丹竈熱
一天雷雨劒池秋倘伴藥市經旬醉問信巢仙數夕留
却過故廬應一歎岸邊猶繫采菱舟

若耶村老人

昔聞若耶村意象乃物外皤然阡陌間來往幾鮐背無

論百歲翁甲子數至再我來親見之殊未較畊耒曩事
一一言多聞雜諄誨回頭指丁壯此是曾玄輩有翁又
過我家有孫五代指呼取斗酒山果雜細碎顧我使云
年慙縮不能對恭惟大父行不覺投杖拜養生惟一嗇
此在吾術內翁能信踐之成就乃爾大我今纔耄及耳
目已憤憤長庚雖餘輝敢與明月配

霜曉

霜有連甍白林無一葉青紙衾圍栗烈風響送東丁酒

盡尊餘滴灰深火撥星蓬窓了無事默坐養黃庭

山澤

我本山澤人散誕傲簪裳宦遊五十年天遣還農桑東
阡南陌間吾亦愛吾鄉楚祠坐秋社隋寺觀夜場醉迷
采蒼耳旅飯炊黃粱自疑太古民百年樂未央有時閒
暇時頗復誦老莊亦嘗遊岷峨略聞度世方氣為東道
主主安客自長却後五百年見我灞城旁

遠遊

姓字不須通從來號放翁月明登暑雪木落過秋風

成都

武擔山暑雪堂歸州巴東縣江上清風亭皆絕景

處處題僧壁時時卧釣篷始

知侯萬里未必是英雄

北窗

破屋頽垣嘯且歌一窗隨處寄婆娑閱人每歎同儕少

遇事方知去日多雲濕沙洲秋下鴈雨來荻浦夜鳴鼉

何時更續扁舟興剡載耶筒醉綠蘿

綠蘿溪在武夷

醉題

目光炯炯射車牛何至隨人作浪愁身處江湖如富貴
心親魚鳥等朋儔孤帆滅沒三湘曉野店荒寒二華秋
醉墨不容塵土汙憑君試訪寺家樓

幽居

練褐藤冠物外裝下簾留住欲殘香瀟湘客過誇魚具
瀟皖僧來說藥方詩未遽衰猶跌宕書雖小退亦軒昂
不緣厭靜尋幽事老去無如白日長

連陰欲雪排悶

先生經旬甑生塵藜羹不汚白氎巾魯連敢謂天下士

摩詰要是山中人

王維自稱
山中人

溪從灘瘦愈刻厲山自木

落增嶙峋雲重惟愁雪欲作梅花忽報一枝春

示子聿

古學尊皇極淫辭斥異端人才如爾少老健及吾難身
退桑榆暝家貧菽水歡人生粗足耳衣食不須寬

項里溪上見珍禽曰溪鵲相隨數十步不去

涉溪來過東溪老斷枝槁葉紛如埽忽逢溪鵲昔未識

言語惺惚羽毛好異哉馴狎若可呼迹雖甚疎情有餘
上穿蒼煙立高樹下踏白石窺遊魚老夫日日溪頭行
見此不妨雙眼明定交物外從今始豈獨沙鷗可與盟

冬夜對書卷有感

人生如夢終當覺世事非天孰可憑萬卷雖多當具眼
一言惟恕可銘膺所聞要足敵憂患吾道豈其無廢興
白髮蕭蕭年八十依然父子短檠燈

項王祠

項里溪水聲潺湲溪上青山我髻鬟煙村人語虛市合
石橋落日漁樵還堂上君王凜八尺大冠如箕熊豹顏
築祠不知始何代典祀千載誰敢刪肅清亭障息剽奪
埽蕩螟螣囚神奸范增玉斗久已碎虞姬粧面留餘潛
小人平生仰遺烈近廟欲結茅三間時時長歌拔山曲
醉倒聊慰窮途艱

入城

宿凍迷車轍晨霜縞瓦溝路長休小驛風勁透重裘
買

殘軀健健芒芒去日道親交喜握手隨處小遲留

出城

病鶴寒彌瘦孤松老不枯非關畏軒冕本自樂江湖
錦添詩句羸駮入畫圖兒孫候門久喚取倒殘壺

不入城半年矣作短歌遣興

我居城西南渺渺水雲鄉舟車皆十里來往道豈長今
夏我來時天風吹荷香再來已孟冬慘然天竇霜市南
兩株柳葉盡萌已黃乃知多事人歲晚空悲傷名監墮

劫火鞠為瓦礫場河橋比一新華表照康莊成壞莽相
尋推理海茫茫疾豎造化兒吾手扼其吭砥柱天下險
一葦乃可杭養氣倘能全斯言豈荒唐

先大父以元祐乙亥寓居妙明僧舍後百餘年當
嘉泰癸亥游復假榻一夕感歎成詠

楚公仙去幾秋風巷陌蕭條舊隱空遺老即今無處覓
斷香殘照淚痕中

志學

聖門志學豈容差山立方當斤百家早忝授經聞博約
晚羞同俗陷浮華風勢槁面寒無褐雷轉饑腸飯有沙
漫道哀慵貪睡美五更和夢聽城笳

晚行舍北

逆旅將歸客扶衰取次行霜濃木葉盡水落岸痕生
鳬鴈浮寒浦牛羊滿晚晴東村隔煙寺杳杳送鐘聲

幽居述事

曾會蘭亭醉墮簪後身依舊住山陰琴傳數世漆文斷

鶴養多年丹頂深
滌硯灘頭無漬墨
吹簫月下遺音
小詩戲述幽居事後有高人識此心

又

頽然掩戶不妨奇
又賦幽居第二詩
大藥鼎成令虎守
精思床穩用龜楮
壺中自喜乾坤別
局上元知日月遲
更就羣童閒鬪草
人間何處不兒嬉

又

落葉平溝日滿廊
幽居又賦第三章
喜無俗事干靈府

恨不終年住醉鄉上樹榜船雖老健疏泉移竹亦窮忙
山僧欲去還留話更盡四炷一炷香

又

舴艋東歸喜遂初頻拈枯筆賦幽居細燒栢子供清坐
明點松肪讀道書蒼爪嫩芽開露茗紅根小把淪煙蔬
年來自許機心盡頗怪飛鷗自作疎

十一月五夜風雪寒甚燃薪取暖戲作五字

束薪從澗底及此不時求力比鵝黃酒功如狐白裘分

才具糜粥餘事煖衾裯復恐成驕惰三更起飯牛

魯墟

先太傅舊宅

魯墟無復壞垣存偶榜舟來入亂雲杜曲桑麻猶鬱鬱
桃源雞犬亦欣欣青園舊墅千峯立綠引官河一脈分
我卜數椽差不遠得歸何以報吾君

曉雪

遶湖誰琢玉為屏換却南堂萬疊青老子醉狂還自笑
持竿畫字滿中庭

又

觀雪剡溪天下馳題詩常恨不能奇
未應便許凝之句此興何曾有盡時

養生

西遊曾受養生書
晚愛煙波結草廬
兩皆神光穿夜戶
一頭胎髮入晨梳
邀雲作伴遠志返
與鶴分窠寬有餘
占盡世間閒事業
任渠千載笑迂疎

夜讀鞏仲至閩中詩有懷其人

詩思尋常有偏於客路新能追無盡景始見不凡人細
讀公奇作都忘我病身蘭亭盡名士逸少獨清真

獨意

酒似交情薄愁隨夜漏長常貧且撐拄多病不禁當偶
讀書終卷閒臨帖數行翻憐市朝客擾擾為誰忙

十一月十三日夜

風雪正相禁蕭然一點燈擁爐蒙衲被就壁倚枯藤火
降神方王河潮腦自凝鄰雞太多事三唱請晨興

故人趙昌甫久不相聞寄三詩皆傑作也輒以長

句奉酬

海內文章有阿昌數能著句寄龜堂就令覲面成三倒
未若冥心付兩忘道義極知當負荷風波那得易禁當
相思命駕應無日且約陶然寓醉鄉

夢中賦早行

夜分秉炬治裝賫千里霜風入馬蹄擁褐却尋孤驛夢
垂鞭時聽近村雞荒烟漫漫沉殘月宿莽離離上古隄

天色漸分寒更力道旁沽酒圻官泥

兀兀

兀兀初何有悵悵不自知偶然登耄及便欲數期頤把
釣秋風夕騎驢晚雪時江湖遊已徧更作灞城期

哺猿

有書常懶讀有酒常懶醉惟有默坐佳又以睡為祟不
如捨之起扶杖來東園摘此幽澗菓哺我高枝猿食菓
飲清泉猿計亦何闕但恐夜霜時腸斷巴山月

與子坦子聿元敏犯寒至東園尋梅

北風吹人衣欲僵老翁畏冷畫閉房梅花忽報消息動
意氣山立非復常二兒一孫奉此老瘦藤天矯凌風霜
幽禽白頰忽滿樹似與我輩爭翱翔溝絕無聲凍地裂
耿耿寒日青無光歸來相視不得語小榼一寫鵝兒黃

示諸孫

蝸舍鷄衣老可哀哀顏時為汝曹開朱門莫羨煮羊脚
糲食且安羹芋魁家塾讀書須十紙山園上樹莫千回

但令學業無中絕秀出安知有後來

題三壁

皤皤太平民堂堂太耄身乾坤一旅舍日月兩車輪
養貴超三品蔬甘敵八珍明年真耄矣爛醉海山春

又

力穡輸公上藏書教子孫追遊屏表馬宴集止雞豚
寒士邀同學單門與議婚定知千載後猶以陸名村

雜言示子聿

福莫大於不材之木禍莫慘於自躍之金鶴生於野兮
何有於軒桐爨則已兮豈慕為琴古今共戒玉自獻卷
舒要似雲無心廬室但取蔽風雨衣食過足豈所欽我
今餘年忽八十歸耕幸得安山林逢人雖歎種種髮入
塾尚憶青青衿吾兒殆可守孤學相與竭力窮幽深

夜坐聞大風

天曠穹廬覆風豪野戰酣詩成飛醉墨棊罷縱高談奇
怪空堪笑低摧亦未甘東浮雲海去會載酒千甌

歸老

歸老何妨駕鹿車平生風雪慣騎驢
髭毛白盡猶耽酒目力衰來轉愛書
止足極知於道近癡頑更喜與人疎
著身莫怪無閒處地肺天台儘有餘

懷舊

扇子硯中有隱士清江一曲照柴荆
當時舩急失一見至今共憶暮猿聲

又

青城之西谿谷聲道翁巢居獨鼓琴一盃松麪留我宿
夜半虎嘯風生林

又

剡溪百里徹底清石闌千裏真人行大丹一粒擲溪水
禽魚草木皆長生

劔南詩藁卷五十五

欽定四庫全書

集部
劔南詩稿卷五十六

詳校官庶吉士臣陳若霖

主事臣呂雲棟覆勘

總校官檢討臣何思鈞
校對官修撰臣戴衢亨

謄錄監生臣楊浚明

欽定四庫全書

劔南詩藁卷五十六

宋 陸游 撰

道室雜詠

烏化雙鳬杖化龍
雲山回首不知重
樂園夜嘯丹臺月
酒市秋聽紫閣鍾
豈但煙霄隨步武
故應冰雪換形容
小童開戶驚奇事
野鶴來巢砌下松

又

莫怪先生閱事多人間何處不經過天山八月霜枯草
暘谷三更日浴波酒熟春風歸掌握丹成神物共誰何
散人本帶江湖號四百年來一釣蓑

又

身是秋風一斷蓬何曾住處限西東棊枰窗下時聞電
丹竈巖間夜吐虹采藥不辭千里去釣魚曾破十年功
白頭始悟頭生妙盡在黃庭兩卷中

偶與客飲客去戲作

多泥窮巷破茆屋人不堪憂心自足有時負日向門前
手把南華日中讀若教開門與客遊擾擾依前懷百憂
平生自計亦已熟惟有釣魚湖水頭舊聞仲長子光可
與友瘖不能言但耽酒安得此友常過門一語不交傾
數斗

故里

故里淳風比結繩歸耕況遇歲豐登已侵鐘漏行安往
略有園廬退可憑萬事寧容媿天地一心常若蹈淵冰

區區僻見君無怪人固終身有不能

齟齬

人生天地間本非金石堅況復歷歲久蠹壞無復全齟
齬雖小病頗解妨食眠昨暮作尤劇頰輔相鈎聯欲起
懶衣裳欲睡目瞭然恨不棄殘骸蛻去如蛇蟬或當學
金丹揮手凌雲煙逢師定悠悠丹成在何年

冬夜

悠悠孤夢伴餘醒窗下寒燈黯闇明雪意欲成風正惡

漁舟忽過鴈羣鳴志哀但有徂年感身沒應無後世名
猶幸耄期身粗健天公原不負書生

枕上

鐘鼎初何有山林亦足雄行思絕大幕歸但醉新豐
雁過荒寒外燈殘寂寞中蒼顏無鏡對那覺是衰翁

寒暑

寒暑侵陵日夜哀坐令齒髮不支持愛憎徇物去忘反
神氣養形誰不知布帛九條晨入靜柏床五尺夜精思

舊交勿恨江湖別雲海神山會有期

長溪東山容老索月谷幽賞詩

人間底處無明月只要青山為發揮
林裏枝寒無鵲立水邊路白有僧歸

右月谷

清泉白石君家物美竹名花可旋移
幽賞定知隨處勝更須時展放翁詩

右幽賞

梅

若耶溪頭春意慳
梅花獨秀愁空山
逢時決非桃李輩
得道自保冰雪顏
僊去要令天下惜
折來聊伴放翁閒
人中商略誰堪比
千載夷齊伯仲間

歲晚幽興

梅出疎籬柳拂池
流年已迫早春時
壯心卓犖猶欺酒
老業呻吟未廢詩
眼暗觀書如棘澀
齒疎噉飯似牛呵
風爐欲試蒼鷹爪
自向林間拾墮枝

又

殘年欲遂迫期頤
追數朋儔死已遲
卜塚治棺輸我快
染鬚種齒笑人癡
近聞有醫以補種墮齒為業者
野梅墮地草生後
街柳拂鞍冰泮時
滿眼雲山不須買
剝傾新釀賦新詩

又

萬里風波行路難
君恩尚許綴祠官
中庭鬱鬱藥苗長
絕壁颼颼松吹寒
泥巷有人尋杜甫
雪廬無吏問秦安
清晨對鏡增幽致
龜屋新裁二寸冠

又

短鬢元知不久青
況聞九帙數餘齡
全家共保一忍字
累世相傳三住銘
時泛孤舟過梅市
却穿雙屨上蘭亭

擁爐莫恨無僧在
滿院松風要細聽

先太傅親受三住銘於施肩吾先生

授游曰汝其累世相傳毋忽因即以傳韋虞諸子

寄題胡基仲故居

憶昔公來一束書
蕭然不復畜童奴
浮雲每歎成蒼狗
空谷誰能繫白駒
才氣沙塵埋巨闕
文章林壑吼於菟

旅墳三尺雲門寺又見離離長綠蕪

雪夜

雪聲如飛沙風聲如翻濤三更天地闇雪急風愈豪頗
疑虛空中鬼神戰方鏖勝負要一決利兵未肯橐我如
墮重圍百計無由逃僵縮不能寐起坐擁故袍自歎老
益貧庭草常不埽惟酒不憚費貸券如山高園蔬甘且
柔味不減豚羔醉此風雪夕聊慰抱瓮勞

聽雪為客置茶果

病齒已兩旬日夜事醫藥對食不能舉況復議盃酌平生外形骸嘗恐墮貪著時時隣曲來尚不廢笑謔青燈耿窗戶設茗聽雪落不飮栗與梨猶能烹鴨脚

獨夜

燈花還自結雪片夜方深瘦影忝危坐清愁入苦吟江湖身汗漫藥石病侵尋朋舊凋零盡何人識此心

寄題王才臣山居

王子自少無他娛求佳山林結草廬頭童齒豁已衰矣

衣弊屢空常晏如出遊耻懷襴衡刺歸卧盡讀倚相書
它日叩門傾白墮要看著句到黃初

夜賦

練色亭臯月江聲木杪風開書燈煜煜傳漏鼓鼕鼕流
落諸生老呻吟四壁空生涯君勿笑淡話有兒同

雪後

雪後晴初快春前日漸長菊根萌已動梅蕊意先香禽
語驚幽枕冰消漲野塘衰殘難出戶不是懶衣裳

又

冰開地沮如雲破日曈曨
鴻入青冥際草生殘燒中
方欣畢公稅已復始農功
稻壠牛行處泥翻夕照紅

寒夜讀書

老去無他嗜書中有獨欣
月窗雞喔喔霜野犬狺狺
雖歎吾何適猶尊昔所聞
從今倘未死一日亦當勤

對食戲作

霜餘蔬甲淡中甜
春近靈苗嫩不歛
采掇歸來便堪煮

半銖鹽酪不須添

又

白鹽赤米了朝舖
扣項何妨煮瓠壺
一種是貧吾尚可
隣家稗飯亦常無

又

春前臘後物華摧
時伴兒曹把酒盃
蒸餅猶能十字裂
餛飩那得五般來

又

枳櫚子嫩供香飯
皂莢芽新簇冷淘
常使先生飽捫腹
其餘萬事一秋毫

又

冰壺欲著先生傳
髯簿卑凡豈得書
常恨當年定交晚
枉教渴死老相如

又

黃昏來扣野人扉
笑語欣欣意不遲
對火正紅煨芋美
不妨秉炬雪中歸

甲子立春前二日作

頭風初愈喜身輕
書卷時開覺眼明
養熟犬雞隨坐起
性靈烏鵲報陰晴
韭菘飢餒春盤好
芝朮筵和臘藥成
自笑哀殘殺風景
燈時不擬入重城

家居自戒

曩得京口俸
始卜湖邊居
屋財十許間
歲久亦倍初
執花過百本
嘯咏已有餘
猶媿先楚公
終身無屋廬

又

平生少愧怍動以直自遂雖墮虎兇羣我已無死地神

仙果可學

道藏有神
仙可學論

吾輩恐差易勿言聞道晚努力補

黥劓

又

世人無奈愁沃以盃中酒未能平磊塊已復生堆阜治
水不治源九載亦何有不如讀周易一卷常在手

又

疾病當治本神醫古難遭哀哉有限身日與利慾鑿大

嚼徒為貪劇飲豈足豪淡薄以養壽亦非慕名高

又

饑寒陷侵暴其實可憐傷一事百自反忿心冷如霜恕
物學者心省事慮亦長吾過固多矣責彼何暇詳

又

霜嚴難報晨月落犬聲盜遺粒與棄糠每愧不足報桂
奴事樵汲跣婢勤爨竈有過姑教之筆楚置勿道

感貧

經歲無兼味寒冬止破裘翁將貧博健兒以學忘憂士
固安天命吾寧為食謀八荒如可望時亦上高樓

鄰曲

濁酒聚鄰曲偶來非宿期拭盤堆連展

淮人以麥餌

洗甬煮

黎祁

蜀人以豆腐名

烏牯將新犢青桑長嫩枝豐年多樂事相

勸且伸眉

送客

有客相與飲酒盡惟清言坐久饑腸鳴殷如車輪翻烹

栗煨芋魁味美敵熊蹯一飽失百憂抵掌談羲軒意倦
客辭去秉炬送柴門林間鳥驚起落月傾金盆

夜寒起坐待旦

懽恍不成寐攬衣寒夜中青熒煨芋火韉鞞鼓簾風卷

犬聲如豹

見王維與
裴迪書

山童首似蓬悠然束書坐徐待日

生東

信手翻古人詩隨所得次韻

病起瘦可驚峻嶒夜窗影八十遂當至何止踐良境食

簞幸得盡藥裹亦已屏汲泉煮日鑄舌本味方永士苦
不自悔常若錐見穎叔度獨何人長波渺千頃

右夜坐

孔門春服成弟子從沂浴老氏坐中庭莊生記新沐古
聖自潔清如日浴暘谷豈比流俗人蟣蟲生桎梏老人
喜時節良夕當爆竹未濯三生垢湯沐意亦足豈惟寓
蕭散亦以洗榮辱悠悠獨酌罷投枕睡已熟

右除夜沐浴

甲子歲元日

飲罷屠蘇酒真為八十翁本憂緣直死却喜坐詩窮米

賤知無盜雲露又主豐一簞那復慮嬉笑伴兒童

開歲微陰

不雨法
當有年

初春書懷

六十餘年慕古人即今方近葛天民見人名是元非恕
遇事皆安豈怨貧小圃鉏耰聊過日扁舟煙雨尚關身
出門未覺龍鍾在禹廟蘭亭又見春

又

老及光陰古更稀自今惟有數期頤
食觀本草雖多事醉讀離騷自一奇
物外有人閒始見山中可樂老方知
武陵好在桃千樹短櫂相尋亦未遲

又

數掩蘆藩竝水居一家全似業樵漁
春寒例謝常來客老病猶貪未見書
馴雀正緣拋食慣芳蘭肯為礙門鋤
藥苗滿鉢無人共賴有溪僧為破除

又

甫及初春日已長偶同鄰曲集山房囊盛古墨靴紋皺
箬護新茶帶胯方老境不嫌來冉冉流年直恐去堂堂
清泉冷浸疎梅蕊共領人間第一香

又

底處人間無駭機超遙且喜謝招麾千年澗底孤松秀
萬里天邊獨鴈歸服氣昔常憎火食遊山近已製荷衣
青城況有幽人約會守丹爐隱翠微

又

納祿貧如筮仕初歸來依舊卧蝸廬半池墨潘臨章草
一盤松肪讀隱書長鑱僅供饑子美清江不療渴相如
耄期自許詩情在雪裏猶能跨蹇驢

又

愚公不解計安危行盡人間惡路岐難似車登蛇退嶺
險如舟過馬當祠平生憂患常難測送老安閒敢自期
一事不成應有命惟將知止報明時

初春紀事

窗櫺無日影庭樹無風聲微雲淡天宇非陰亦非晴
美哉豐年祥入我屠蘇觥父老亦共喜驩言叩柴荆一飽
已有期惟當力春耕遣兒牧雞豚作社賽西成

又

經冬少雨雪所至苦水涸園蔬葉多蠹山步船半閤入
春一再雨喜氣盈墟落又聞湖邊路已破小桃萼一尊
儻可攜父子自斟酌

送子虞吳門之作

相送何由插羽翰
淡烟微雨暗江干
孤懷最怯新春別
病骨難禁昨夜寒
尊酒汝寧嫌魯薄
釜羹翁自絮吳酸
此詩字字俱愁絕
忍淚成篇却怕看

法雲僧房

八十衰翁有底忙
水邊山際亦徬徬
清溪橋斷舟橫岸
小塢梅殘雨漬香
數點青燈經野市
一爐軟火宿僧房
自嫌尚有人間念
却為春寒怯夜長

陌上

陌上長歌任笑狂此生得喪略相當天將老齒償貧悴
身坐虛名掇謗傷溪水漸生朱舫活野梅半落綠苔香
新晴快上蘭亭路莫待春殘始一觴

獨立

白髯蕭颯一愚公獨立濛濛細雨中羊踏寒蔬新少夢
魚生空釜久諳窮殘編幸有聖賢對閒話豈無鄰曲同
銜鸞才名非老事小詩信筆不能工

春陰

數間茅屋傍楓林常負平生萬里心老去逐年增老病
春來無日不春陰麴塵蘸岸波初漲猩血團枝色已深
欲到東園還嬾起却和殘睡聽鳴禽

閒味

身似枯禪謝世塵豈容收斂強冠巾庾郎三韭不妨飽
晏子一裘何恨貧栖冷每憐雞唱早雲開初見月痕新
閒中有味君知否熊掌馳峯未是珍

聞虜亂代華山隱者作

滿谷松風枕石眠中原戰血又成川
但思秦鑄銅人日不記齊成栢寢年
大藥一爐燉晚日孤桐三尺寫秋泉
何妨狂舞旗亭下乞與人間畫醉仙

春日

車馬閒中絕衣襦病後寬
改詩消晝永賒酒敵春寒
柳細搓難似花新染未乾
歸鴻與來燕各自管悲歡

寄子虞

十里城南路蕭然一秃翁舊書衰易忘新句嬾難工
山色春寒淡溪流宿雨通街頭有良醞思汝一尊同

送子坦

老境寧容別諸兒仕為貧一春多臥病幾度送行人
五斗方須祿千金且愛身長安雖可樂憐汝正思親

送子適

初欲赴春銓以兄弟皆出故輟行

隔一濤江路豈遙躊躇不覺欲魂銷寄書勿遣過三日
發渡何曾無兩潮睡少不關茶作祟愁多却賴酒時澆

柯橋西畔斜陽岸誰為離人惜柳條

醉眠初起書事

身世元知似斷蓬流年分付酒盃中
飢寒未解士先老風雨欲收花已空
泥補舊巢梁燕喜水生支港釣舫通
睡魔正費驅除力隔竹敲茶賴小童

見蜂采檜花偶作

來禽海棠相續開輕狂蛺蝶去還來
山蜂却是有風味偏采檜花供蜜材

對酒戲詠

不管詩人太瘦生
但願酒徒稀
醉眠憑誰為畫
畢吏部
縛著隣家春氣邊

又

長安市中多美酒
一斗財當三百錢
堪笑書生消幾許
有錢十萬醉經年

夜興

臬呼作人聲
月出如野燒
推枕中夜起
殘燈尚餘照
難

從公榮飲獨效孫登嘯八十推不僵
平昔豈所料空廊
病馬卧枯草老牛噉明朝語俗人與汝不同調

老甚自詠

殘年真欲數期頤一事無營飽即嬉
身入兒童鬪草社
心如太古結繩時騰騰不許諸人會
兀兀從嘲老子癡
亦莫城中買鹽酪菜羹有味淡方知

又

羨生常笑古人癡
俛仰那知迫耄期
鏡裏鬢無添白處

尊前顏有暫丹時客瞋終歲常稱疾兒訝經旬嬾賦詩
枉却愁過强健日身閒何往不熙熙

夜過魯墟

晡時發柯橋申夜過魯墟燈出籬落間七世有故廬門
低不容駟壁壞亡遺書高樹宿羈鳥廢沼跳驚魚移舫
過古埭水面涵星疎安得病良已畢世澆春蔬

園中小飲

造物佚我老畀以江湖寬俯仰六年間得請兩挂冠鬢

毛雖蕭颯腳力未蹶跚記書過十張噉飯空一簞開歲
忽兩月感此春事殘杏靨笑牆頭鶯聲入雲端埽地設
菅席相與勸加餐村酒瀉濁清野果嘗甘酸鄰里語蟬
聯兒孫話團樂雖無萬錢筋浩歌有餘歡

幽居春晚

雲歸禹穴賞新晴酒買蘭亭散宿醒竹帶鞭移俄盛出
鶴全窠買已長鳴故山雖媿收身晚外物元如脫髮輕
只恐村鄰成間濶杖藜隨處叩柴荆

又

老廢離書病廢詩
晝間惟與睡相宜
未尋內史流觴地
又近龐公上塚時
花發遊蜂喧院落
筍長馴鹿入藩籬
石帆山下春如許
野老來招不用辭

梅花過後遊西山諸菴

乞得身歸喜滿顏
柴門雖設不曾關
無如梅作經年別
且就僧分半日閒
樵斧曉穿雲外去
釣船夜向月中還
君看老子無窮樂
一笑知非造物慳

梅僊塢花涇觀桃李

妖妍天遣占年華嘆息人間有許花
十里織成無罅錦半天留得未殘霞
欲題直恐無才稱不見何由信客誇
醉後又驚春事晚湖隄煙柳已藏鴉

家園賞花

白首扁舟返舊邦逢春直欲倒千缸
紅雲夾路薔薇障翠羽成層薜荔幢
鶯語枝頭常盡日蝶迷葉底不成雙
閒人爛醉尋常事中聖先判卧北窗

聞金谿陸伯政下世

久矣望來使潛然開訃書兩家通絕譜千里泣靈車亦
悟古皆死所悲天祝子泉扃生氣在故不羨曹蜍

一春風雨大半有感

忽忽春將老寒暄尚未齊雨昏雞唱晚風惡鵲巢低寫物
才殊退尋芳思欲迷餘年不須較只是死秦稽

山行贈野叟

垂白衰翁住道邊突間猶喜續炊煙壁如龜筮難占卜

瓦似魚鱗不接連
幼學及時兒識字
官租先衆吏無權
與君俱長宣和日
握手相看一悵然

又

莫笑孤村生理微
茅茨煙火自相依
客來旋埽青苔榻
日在先關白版扉
婦女憂蠶租葉去
兒童耘麥荷鉏歸
散人世襲江湖號
剩欲溪頭借釣磯

雲門道中

川靄林扉翠欲浮
散人心事寄沙鷗
暮投野店孤煙起

曉涉清溪小蹇愁嶺路窮時縈細棧山形缺處起重樓
釣游陳迹渾如昨一念悽然不自由

讀書有感

洙泗諸生尊所聞豈容兀者亦中分焚經競欲愚黔首
亡史誰能及闕文吾道固應千古在幾人虛用一生勤
世間倚相何曾乏會與明時誦典墳

六言雜興

世界菴摩勒果聖賢優鉢曇華但解折衷六藝何須和

會三家

又

夢裏明明周孔胸中歷歷唐虞欲盡致君事業先求養氣工夫

又

語道無如孔孟佛莊雖似非同倘有一人領會何須客滿坐中

又

失馬詎知非福亡羊不妨補牢病裏正須周易醉中却要離騷

又

舉足加劉公腹引手將孫郎鬚士氣日趨委靡賴有二君埽除

又

廣平作梅花賦少陵無海棠詩正自一時偶爾俗人平地生疑

又

瘦馬羸僮道路清泉白石山林常得有衣換酒不愁無

法燒金

又

一夜雨來可怖五更雲散無餘傳舍僧窗雖異不妨隨

處觀書

又

熟讀大小止觀精思內外黃庭直使超然有得豈若淵

源六經

春晚出遊

風急名花紛絳雪
土鬆香草出瑤簪
且呼野艇西村去
未必微雲便作陰

又

王孫草生與階齊
女郎花發乳鶯啼
街頭賣酒處處賤
信脚覓醉無東西

又

柳暗人家水滿陂
放翁隨處曳筇枝
村深麥秀蠶眠後
日暖鳩鳴鵲乳時

又

禹吾無間聖所歎
治水殆與天同功
三千年事一炊頃
窆石嵯峨煙靄中

又

岌岌高丘近道邊
寂寥翁仲卧荒烟
生前意氣今何在
寒食無人掛紙錢

又

鳴機裂素製春衣
煮酒香清雁鵝肥
倒社相呼共行樂
三撾鼓近是船歸

劔南詩彙卷五十六